



KAMIS, 27 Oktober 2022

Ogen: Masmur 119:9



Nggeloh la erpandangan



Masmur 119 lit 176 ayat. Kerina nuriken kerna "kemalemen ate i bas ndalanken Kata Tuhan." Kuga banci anak perana njagai geluhna maka la erpandangan? Jabapna e me alu ngikutken Kata Tuhan. Asum kegeluhenta lanai terukuri kita, asum kegeluhen enda la bagi ukurta entah la bagi si ibayangken kita, sangana kegeluhenta i bas titik si meterukna, ngatakan bujurlah man Tuhan erkiteken lit i bas kita "buku petunjuk" guna ngalaken si e kerina. Pustaka Si Badia, i je Tuhan ngerana, nuduhken dalam si man bentasenta. Jadi penungkunen man banta e me: Payo nge Kata Tuhan e banci mereken gegeh guna nggeluh la erpandangan? Payo nge Kata Tuhan e banci mereken gegeh guna nggeluh i bas kemalemen ate? Jabapna e me 'tergantung.' Bagi kalak sakit, tambar nggo lit, bagi barang elektronik, buku petunjuk nggo lit, tapi persoalenna tambar e ipan ntah lang, buku petunjuk e ioge ntah lang, e kerina tergantung kita. Pustaka nggo lit, kata Tuhan nggo lit. Benakenlah guna ndarami sura-sura Tuhan nandangi geluhta. Ayat 10 ikataken alu bulat ukurku kucubaken ndarami Kam, ula pediat aku nilah i bas KataNdu nari.

Masalahna kenca ioge-oge pe tetap denga la iangka. Pernah nge si oge Pustaka tapi labo si dat antusenna? Piahna e si erbansa kita kisas mulihi. I je pentingna nggeluh i bas persadan, nggeluh i bas perpulungen, kita la si sada, enterem senina ras turanta si ndarami sura-sura Tuhan bage pe radu ras erjuang guna ndatken kemalemen ate i bas Tuhan. E maka mbue kal ibahan dahin-dahin i tengah-tengah perpulgenta e me PJJ, PA gelah tujunna ku kemalemen ate ras kegeluhen si la erpandangan. Reh kita ntah lang e tergantung kita. John L. Mason ngatakensa, buku buku si nioge kita mereken informasi, tapi Pustaka Si Badia si ioge kita maba transformasi.